

تِيسْ سَنَاتٍ تِبْرَاتِينْ إِيمُونْ غُ كُورِنْثُوسْ

1

إِفْرِ إِزْوَارْنْ

¹ غُ دَارْ بُولُسْ لَيْ يِرَا رَبِّي أَيْكَ أَرْقَاصْ نْ لَمَسِيحْ يَسُوعْ، دْ تِيمُوْثاُوسْ، إِلْكِنِيسَا لَيْ يِلَانْ غُ تِمْدِينْ نْ كُورِنْثُوسْ دْ أَيْتْ رَبِّي لَيْ كُلُّو لَانِينْ غُ تِمْرِتْ نْ آخَائِيَا كُرَا تِلَا. ² أَدَاوْنْ إِفْكَ رَبِّي لَيْ يِكَانْ بَابَاتْخَ دْ سِيدِيَتْخَ يَسُوعْ لَمَسِيحْ لِبَرَكَا نِسْ دْ لَهَنَا نِسْ.

³ أَرْتَحْمَادْ رَبِّي بَابَاسْ نْ سِيدِيَتْخَ يَسُوعْ لَمَسِيحْ دْ بَابْ نْ رَحْمَتْ لَيْ يِكَانْ رَبِّي لَيْ يَاخْ إِتَاوْسْنْ. ⁴ نَتَانْ أَدَاخْ إِتَاوْسْنْ غُ كُرِيَّكَاتْ تِسَاسْتْ، فْ أَنْزُضَارْ أَنَاؤْسْ إِولِي لَانِينْ غُ كُرِيَّكَاتْ أَنَأْوَنْ تِسَاسْتْ سْ تِمَواسْتْ لَيْ يَاخْ إِفْكَا رَبِّي. ⁵ غُمْكَلِي نُومَرْ تَصْغَارْتْ نَخْ إِكُوتْنْ غُ تِرْفُوفَتْ نْ لَمَسِيحْ، أَسْ نُومَرْ تِمَواسْتْ إِكُوتْنْ سْ لَمَسِيحْ. ⁶ إِغْ نَلَا غُ كُرَا نْ تِسَاسْتْ أَفْ كِيسْ نَلَا دْ أَدَاوْنْ نَأْوَسْ دْ أَتْجَمْ، إِغْ أَخْ إِفْكَا رَبِّي كُرَا نْ تِمَواسْتْ هَانْ أَفْ أَخْتْ إِفْكَا دْ أَدَاوْنْ نَأْوَسْ، أَتْرُضَارْمْ أَتْصِبَرْمْ إِتْرُفُوفَتْ أَدْ لَيْ مِ نَصِبَرْ أَلَا نَكِنِي. ⁷ أَشْكُو رَجَا نَخْ غُ لَجِهَتْ نُونْ أُورَا إِتَنْدُودِي. نَسَانْ إِزْدْ غُمْكَلِي دِيدِنْخَ تِمْسَرَكْمْ تِمَشَرَكْمْ تِمَواسْتْ أَلَا نَتَاتْ. ⁸ أَشْكُو نَرَا كِيُونْ أَيِّيَتْمَا أَتِيَسَانْمْ فْ تِسَاسْتْ لَيْ فَلَاخْ إِزْرِينْ غُ تِمَرِتْ نْ أَسِيَا، تِسَانْ إِسْ بَهْرَا فَلَاخْ إِكْزْ أَزْأَرُو أَيِّلِيغْ إِزْرِي لَجِهَدْ نَخْ نَفَضْ غُ إِخْفَاؤْنْ نَخْ. ⁹ نَكْ زُونْدْ إِغْ فَلَاخْ إِتُوتْ لَحُوكْمْ نْ لَمُوتْ، فَادْ أُورْ نَتَكْلْ فْ إِخْفَلُونْ نَخْ وَلَايِنِي أَنَتَكْلْ فْ رَبِّي لَيْدِ إِسْنَكَارْنْ وَلَيِ مُوتَتِينْ. ¹⁰ نَتَانْ أَدَاخْدْ إِفُوكَانْ غُ زُونْدْ لَمُوتْ أَدْ، أَرْسُولْ إِنْكُو نَكِنْ كِيسْ رَجَا أَدَاخْدْ دَاخْ إِفُوكُو. ¹¹ أَلَا كِنِي تَوْسَاتْ أَخْ سْ طَرْلِيتْ غُ لَجِهَتْ نَخْ، إِغْ إِوَاجْبْ رَبِّي إِطْرِلَا نْ كِيَكَانْ دْ مَدَنْ إِفْكَاخْ لَبَرَكَاتْ نِسْ، رَادْ إِكُوتْنْ مَدَنْ لَيْ رَاتْ فَلَاخْ إِتَشْكَارْ.

¹² أَشْكُو مَيَادْ أَسْ نَزْعَمْ: تُوكَا لَيْ فَلَاخْ يِكَا ضَمِيرْ نَخْ أَسْ أَنْزِكِيزْ غُ دُونِيتْ سْ نِيَتْ إِسْقَانْ تِكَصَّاصْ نْ رَبِّي أَبْهُومْ كَرَاتِنْخَ دِيدُونْ، أُورْ نَتَكْلْ فْ لَحْرَشَانْ نَخْ وَلَايِنِي أَفْ نَتَكْلْ دْ نَعْمَتْ نْ رَبِّي. ¹³ هَانْ أُورْ أَيِّوْنِينْ نَتَرَا أَبْلَا فْ أَيِّلِي نَقَرَامْ دْ أَيِّلِي تِسَنْمْ، أَرْتَنْرِجُو أَدْ تَفَهَامْ أَرْ إِسْكَرَا. ¹⁴ غُمْكَلِي يَاخْ تَفَهَمْ يَانْ إِمِيلِكْ، رَادَاخْ سُولْ تَفَهَمْ تِسَانْ إِسْرَنْخْ تِرْعَمْ، غُمْكَلِي رَاسِرُونْ نَزْعَمْ غُ وَاسْ نْ سِيدِيَتْخَ يَسُوعْ.

¹⁵ لَيْغْ حَقَاقْخَ مَيَادْ أَرْسِكِيلْخَ أَنْ زُوَارْ دَرُونْ أَشْكَخْ، فْ أَدَرُونْ نَلِي لَفَايِتْ يَاضِنْ. ¹⁶ هَيْ رَانْ دَرُونْ زَرِيخْ إِغْ دَيْخْ سْ مَكْدُونِيَا، أَصْوَخْ دَاخْ سْ دَرُونْ إِغْ دَرِيخْ غُ مَكْدُونِيَا، فَادِيَ تَاوِسْمْ أَدْ مُودُوخْ سْ لَيَهُودِيَا. ¹⁷ إِزْدْ إِسْ تَغَالْمْ إِسِيَ تَكُوتْ تَفَسِي لَيْغْ يَادْ سَكْرَخْ فْ مَيَادْ بَادِلْخْ رَيِ نُو؟ نَغْدَ إِسْ صَفُورْخْ لَغْرَضْ إِنُو أَيِّلِيغْ أَتِتِيَخْ يَاهْ يَاهْ سْ دَاخْ نِيَخْ أَهُو؟ ¹⁸ وَلَايِنِي رَبِّي لَيْدِ أُورْ إِتَضَانْ غُ وَالْ نِسْ إِكَأِنْكِي

فْ وَوَالْ نُخْ لِي سْ أَلْيُونْ نَتْتِي إِسْ أُورْ إِكِي يَاهْ إِكْ أُهُوْ غْ يَاتْ تَسَاعْتْ. ¹⁹ أَشْكُو بِوْسْ نْ رَبِّي يَسُوعْ لَمَسِيحْ لِي سْ نَنْتِشَارْ غْ كُرْتُونْ نَكِي دْ سِلْوَانْسْ دْ تِيمُوْثَاوُسْ، أُورْ أَيْنِكَاهْ سْ دَاخْ إِكَا أُهُوْ، وَلَائِنِي يَاهْ أَبْدَا إِكَا. ²⁰ نَتَّانْ أَيْكَانْ يَاهْ إِيلِي سْ كُلُو إِقاوْلْ رَبِّي، دْ إِسْمْ نِسْ أَسْ نَتْتِي آمِينْ إِلْمَجْدُونْ رَبِّي. ²¹ وَلَائِنِي ولِي يَاهْ دِيدُونْ إِنْتَانْ غْ لَمَسِيحْ إِسْتِي يَاهْ، أَتْ إِكَانْ دْ رَبِّي، ²² نَتَّانْ أَفْلَاخْ إِكَانْ رَشْمْ نِسْ، إِفْكَاخْ لَعْرُوبُونْ نْ رُوحْ غْ أُولَاؤْنْ نَخْ. ²³ وَلَائِنِي رَبِّي أَمْ غَرِيْخْ أَفْلِي كِيْنِي، إِزْدْ أَفْنْ دَرُونْ أُورْ أَشْكِيْخْ سْ كُورِنْشُوسْ دْ إِسْ رِيْخْ أَكِيْونْ حُنُوكْ. ²⁴ أُورْدْ إِسْ أَنْصَمِيرْ غْ لِيَمَانْ نَونْ، وَلَائِنِي إِسْ نَرَا أَنَاوُسْ إِلْفَرْخْ نُونْ أَشْكُو لِيَمَانْ أَسْ تَغِيمْ.

2

إِفْرِ وِيسْ سِينْ

¹ مِيَادْ أَفْ سُكْرُخْ فَانْ دَرُونْ أَصْوُخْ أَكْنْ كَا دَاخْ أُورْ سَقْعَاخْ. ² أَشْكُو إِغْكُنْ سَقْعَاخْ، مَارَايْ زَا إِسْفَرْخْ أَبْلَا وَلِي سَقْعَاخْ؟ ³ أَرَأْوِنِينْ تَرَاخْ غَمْكُلِي يَوْنِينْ يَادْ أُورِيْخْ حَتَّا إِغْنْ دَرُونْ أَشْكِيْخْ أَدِيْ أُورْ سَقْعَانْ وَلِيْغُنْ قَلْخْ أَدِيْ سَفَرْخْ، أَشْكُو حَقَاقْخْ إِزْدْ إِيلِي يَكَانْ لَفْرْخْ أَدَاوِنْتْ كُلُو إِكَانْ أَلَا كِنِي. ⁴ أَشْكُو أُورِيْخْ أَوْنِينْ غْ تُكْوَضِي إِكُوتْنْ دْ لَقْنَاطْ نْ وُولْ دْ إِمْطَاوْنْ كُوتِنِينْ، أُورْدْ فْ أَكْنْ سَقْعَاخْ وَلَائِنِي أَدْ رِيْخْ دْ أَتْسَانْ مَنْشَكْ أَسْ بَهْرَا دَرِي تَعْزَامْ.

⁵ إِغْ إِكَا كِرَا نْ يَانْ سَبَّا نْ تُكْوَضِي يَادْ أُورْدْ نَكِي كَا أَيْسَقْفَعَا، مِشْ إِسْقَفَعَاكِنْ كُلُوكِنْ نَغْدْ كِرَا كَا كِيْونْ أَنْ أُورْ سَفُوخْ. ⁶ زُونْدْ غُونَا يَوْدَاتْ إِيلِي سْ كُلُو فَلَاسْ تَحْكُمْ. ⁷ غَلَادْ يُوفَاوْنْ إِغْ أَسْ تَصَامِحْ تَوْسِمْ أَسْ أَتْ أُورْ تَنْغْ تُوكْتْ نْ تُكْوَضِي. ⁸ أَرْكُنْ تَضَالَّبْخْ أَدَاسْ تَمْلِمْ إِسْ أَكَانْ سُولْ دَرُونْ إِعْزَا. ⁹ أَشْكُو أَفْ أَوْنِينْ أُورِيْخْ دْ أَكْنْ أَرْمَخْ إِسْ أَتْسَكَارْمْ سْ وَوَالْ إِنُو كُلُوتْ نَغْدْ أُهُوْ. ¹⁰ وَنَا مِ تَصَامِحْ غْ كِرَا هَانْ صَامِحْ أَسْ كِيْسْ أَلَا نَكِي. أَشْكُو إِغْ صَامِحْ إِكْرَا نْ يَانْ فْ كِرَا نْ تَغُوسَا هَانْ كِنِي أَفْ سُكْرُخْ غُنْشَكَانْ غْ لَكْدَامْ نْ لَمَسِيحْ، ¹¹ أَفْلَاخْ أُورْ إِكْ شَيْطَانْ أَشْكُو أُورْ أَخْ خَفِينْ إِسْوِنْكِيمْ نِسْ.

¹² لَيْغْ دِيْخْ سْ تَمَرِرْتْ نْ تَرُواسْ، أَرْكِيسْ تَبِشَارْخْ سْ تِبْرَاتْ نْ لِنْجِيلْ، إِرْزِمِيْيِي سِيدِيَتْخْ لَبَابْ نْ لَخْدَمْتْ نِسْ، ¹³ وَلَائِنِي أُورْ تَهْنَاخْ، أَشْكُو أُورْنْ أَفِيْخْ كِمَا تِيْطُسْ. غَانْ أَفْ أَسْنْ نِيْخْ لَائِهْنِيْكِنْ دُوْخْ سْ مَكْدُونِيَا.

¹⁴ وَلَائِنِي أَرْنَتْشَكَارْ رَبِّي لِي يَاهْ بَدَا إِرْكُورْنْ غْ أَكَبَارْ نْ تُرُوكْزَا غْ لَمَسِيحْ، أَرْسِرْنُخْ إِمَالْ أَصْوُنْ تُوسَنَا نِسْ غْ كُرِيْكَاتْ لَمَكَانْ. ¹⁵ أَشْكُو أَنْكَاهْ دْ زُونْدْ تُوجُوتْ نْ لَمَسِيحْ إِرِبِي غْ كِرْ وَلِي نِجْمِنِينْ أَلَا وَلِي جَلَانِينْ. ¹⁶ وَلِي جَلَانِينْ نِكَايِسْنْ أَصْوُنْ لَمُوتْ إِتَوِينْ سْ لَمُوتْ، وَلِي نِجْمِنِينْ نِكَايِسْنْ أَصْوُنْ تُودْرْتْ إِتَوِينْ سْ تُودْرْتْ. وَلَائِنِي مَانُوا إِرْضَارْنْ إِمَادْ؟ ¹⁷ أَشْكُو أُورْنْ كِيْزُونْدْ تُوكْتْ نْ مَدْنْ لِي زَنْزِينْ

أَرْسَاغْنْ سْ وَالْ نْ رَبِّي، وَلَائِنِي أَرْ نُسَوَالْ غْ لَمَسِيحْ سْ تَمَا نْ بَيْتْ نَخْ، أَوَالْ نْ إِرْقَاصْنْ نْ رَبِّي غْ أَمْنِيدْ نْ رَبِّي.

3

إِفْرِ وِيسْ كِرَاضْ

¹ إِسْ زَا رَادَّا خْ نَتَالْغْ إِحْفَ نَخْ؟ نَغْدَ إِسْ نَحْتَجَأْ دَأْوِينِنْ نَتَرَأْ تَبَرَاتِينْ فْ إِخْفَاؤْنْ نَخْ، نَغْدَ دَأْخَتَنْ تَرَامْ فْ إِخْفَاؤْنْ نُونْ؟ ² كَنِي أَيْكَانْ تَبَرَاتْ نَخْ لِي يَتِيُورَانْ غْ أَوْلَوْنْ نَخْ، سَنَتْ كُلُّ مَذْنَ أَرْتَ كُلُّو أَفَرَانْ. ³ تَبَاتِينْ إِسْ تَكَامْ تَبَرَاتْ نْ لَمَسِيحْ لِي يَتِيُورَانْ فْ أُفُوسْ نَخْ، تَبَرَاتْ دَأْ أُورْ تَيُورِي سْ صَمْحْ وَلَائِنِي أَسْ تَيُورَادْ رُوْخْ نْ رَبِّي إِدَرْنْ، أُورْ تَيُورِي غْ تَلَوَاحْ نْ أُزْرُو وَلَائِنِي أَغْ تَيُورَادْ تَلَوَاحْ نْ تَقْيَا نْ وَلَوْنْ.

⁴ مَيَادْ نُومَنْ سَرْسْ سْ لَمَسِيحْ غْ أَمْنِيدْ نْ رَبِّي. ⁵ أُورْدْ إِسْ نَقْدَأْ إِخْفَاؤْنْ نَخْ أَنَّا إِكَا كِرَا وِينْخْ، وَلَائِنِي دَارْ رَبِّي دَأْ إِكَا كِرِيْكَاتْ، ⁶ نَتَانْ دَأْدَخْ إِفْكَانْ لَجَهْدَ أَنْكْ إِمْشَغَالْنْ نْ لَعَهْدَ لَجَدِيدْ، لِي يَتِيَبَانْ فْ رُوْخْ نْ رَبِّي أُورْدْ فْ تِيرَانْ شَرْعْ. أَشْكُو تِيرَانْ أَنْ أَرْ نَقَانْتْ، رُوْخْ نْ رَبِّي أَرْ يَكَا تُودِرْتْ.

⁷ لَيْغَدْ يُوزْنْ رَبِّي شَرْعْ نَسْ إِمُوسَى تَعْزَانْ لَحْرُوفْ نَسْ غْ أُزْرُو إِسُونْلْ أَسْ لَمَجْدَنْ رَبِّي، أَلِيلِيغْ سُولْ أُورْ رَضَارْنْ أَيْتْ إِسْرَائِيلْ أَنْ سَمُوقْلَنْ غْ أُودْمَنْ مُوسَى، أَشْكُو أَرْ إِسُوفُو سْ لَمَجْدَهْ. لَمَجْدَهْ دَأْ أُورْ إِكِي يَاتْ سَتْ لَاهْ. إِغْدْ إِيَابِينْ لَعَهْدَ لِي يَتِوينْ سْ لَمُوتْ غْ لَمَجْدَهْ ⁸ مَمْنُكْ زَا أُورْ إِتِيَبَانْ لَعَهْدَنْ رُوْخْ أَلَا نَتَانْ غْ لَمَجْدَهْ؟ ⁹ إِغْ إِتِمْجَدْ لَعَهْدَ لِي يَحْكِمْنْ سْ لَعَقَابْ فْ أَفْكَانْ، إِكُوتْ مَنْشَكْ أَسْ رَاتْ يَاكْرْ لَعَهْدَ لِيَتْ إِجْنِجَامْنْ غْ لَمَجْدَهْ أَنْ. ¹⁰ أَلِيلِي مِ إِكُوتْ لَمَجْدَهْ غَادْ إِزْرِينْ، أُورْ إِكِي يَاتْ غْ لَكَدَامْ نْ لَمَجْدَهْ غِلَادْ. ¹¹ إِغْ إِلَا أَلِيلِي تَلَاحْ غْ لَمَجْدَهْ، مَمْنُكْ زَا أُورْ إِلِيَ أَلِيلِي إِداوْمَنْ غْ لَمَجْدَهْ إِكُوتْنْ!

¹² إِغْ نَحْقَاقْ إِسْ دَارْنَخْ زُونْدْ رَجَاجَهْ دَأْ، أَلِيلِي نَسْكَارْ أَرْتْ نَسْكَارْ سْ زَعْمَتْ. ¹³ أُورْ نَكِي زُونْدْ مُوسَى لِي يَكَانْ أَسْدُولْ فْ أُودْمَنْ سَنْ دَأْ أُورْ قَزْنْ أَيْتْ إِسْرَائِيلْ غْ أَلِيلِي تَلَاحْ. ¹⁴ وَلَائِنِي لَعَقَلْ نَسْنْ إِبُوكْضَنْ، أَشْكُو أَسْدُولْ أَنْ إِغَمَا أَكَانْ سُولْ أَرْغَسَادْ إِغْ أَيْقَرَانْ لَعَهْدَ أَقْدِيمْ، أَسْدُولْ أَنْ أُورَدَ إِتِيَتَايِي أَبِلَا سْ لَمَسِيحْ. ¹⁵ أَرْ غَسَادْ، إِغْ أَيْقَرَانْ أَرَاتِنْ نْ مُوسَى أَسْدُولْ أَنْ إِدَلْ أَكَانْ سُولْ أُولَوْنْ نَسْنْ. ¹⁶ وَلَائِنِي وَنَادْ يَوْرِينْ دَارْ سِيدِيتَخْ، أَرْ فَلَاسْ إِتِيَتَايِي أَسْدُولْ أَنْ. ¹⁷ سِيدِيتَخْ نَتَانْ إِكَا رُوْخْ، إِنَّا غْ إِلَا رُوْخْ نْ سِيدِيتَخْ غِينْ أَغْ تَلَّا تَدْرِقِيتْ. ¹⁸ نَكِي كُلُّو يَاخْ إِتِيَتَايِي أَسْدُولْ فْ أَدْمَاوْنْ نَخْ أَرْتِسْمُوقُولْ لَمَجْدَنْ رَبِّي، زُونْدْ تَلَمِريتْ لِيدْ إِتِرَارَانْ لَمَجْدَنْ سِيدِيتَخْ، أَرْتِتِبَدَالْ غْ لَمَجْدَهْ فَانِكْ زُونْدْ نَتَانْ سْ رُوْخْ نْ سِيدِيتَخْ.

إِفْرُ وِيسَ كُوژْ

¹ هَيَ لَيْغَدْ رَحْمَتْ نْ رَبِّي أَسْ نُومَرْ تَوُورِي يَادْ، أُورَا إِيْ لَجْهَدْ نَخْ، ² وَلَائِنِي نِبْضَا دِيْلِي يِنْتَنْ أَرْ إِسْنُحْسَامْ، أُورَا نِتَعْوُشُو يَانْ أُورَا نِسْبَدَالْ أَوَالْ نْ رَبِّي، وَلَائِنِي لَحَقْ أَدْ نِسْبَيَانْ، أَرْنَمَالْ إِصْمَيرْ نْ مَدْنَ أَيْلِي نِكَأْ غْ لَكْدَامْ نْ رَبِّي. ³ وَلَائِنِي إِغْ إِنْتَلْ لِنْجِيلْ نَخْ، هَانْ أُورْ إِنْتَلْ أَبِلَا فْ وَلِي جَلَانِينْ. ⁴ نِتَنِي أُورْ أُومَنْ أَشْكُو إِبِلِيسْ لِي يِنْكَانْ بَابْ نْ تَسْوُتْ أَدْ إِسْبُوكْسْ لَعَقَلْ نَسْنْ، أَدَاسْنْ أُورْ تِسْوُفُو تِقاوْتْ نْ لِنْجِيلْ نْ لَمْسِيْخْ لِي دَارْ صَفَاتْ نْ رَبِّي. ⁵ أُورْدَ إِخْفْ نَخْ أَسْ نِتْبَشَارْ، وَلَائِنِي أَسْ نِتْبَشَارْ دِيْسُوغْ لَمْسِيْخْ مَاسْ إِكَا سِيدِيتَنْخْ، نِكْ إِسْمَكَانْ نُونْ فْ أُودِمْ نِسْوُغْ. ⁶ أَشْكُو رَبِّي لِي يِنْانْ: «أَتِسْوُفُو تِقاوْتْ غْ تِلَاسْ»، نِتَنْ أَدْ إِسْوَفَانْ غْ أُولَوْنْ نَخْ، أَدَاخْ إِمْلْ تِقاوْتْ نْ تُوسَنَا نْ لَمْجَدْ نَسْ لِي يِسْوَفُونْ غْ أُودِمْ نِلَمْسِيْخْ.

⁷ وَلَائِنِي نِكَنِي نِكَأْ زُونْدْ إِرْكُوتَنْ نْ إِدْقِي لِيغْ إِلَّا لَكْنْ أَدْ، أَدْ إِيَانِنْ إِزْدْ رَبِّي أَدْ إِنْكَأْ لَجْهَدْ أُورْدَ نِكَنِي. ⁸ تُوسْ فَلَاخْ غْ كِرِيْكَاتْ تِسْكَأْ، وَلَائِنِي أُورْ نِكَي تَمَا، تُوشْكَايْخْ لَحِيلَتْ مِشْ أُورَا نِنْقَاضْ. ⁹ نِلَأْ غْ تِرْفُوقْتْ، مِشْ رَبِّي أُورَأِيْخْ إِفَالْ، أَرْنُطَارْ سْ وَكَالْ وَلَائِنِي أُورَانْ نِتَعْمَا. ¹⁰ نُوسِي بَدَا دِيدِنْخْ لَمُوتْ نِسْوُغْ غْ دَاتْ نَخْ، أَدْ تِبَانِنْ تُودِرْتْ نِسْوُغْ أَلَا نَتَاتْ غْ دَاتْ نَخْ. ¹¹ أَشْكُو نِكَنِي لِي دَرِنِينْ نِلَأْ بَدَا غْ أَفُوسْ نِلَمُوتْ فْ سِبَّتْ نِسْوُغْ، أَدْ تِبَانِنْ تُودِرْتْ نِسْوُغْ أَلَا نَتَاتْ غْ دَاتْ نَخْ لِي يِتَمَّتَاتْ. ¹² غَمَكَانْ أَسْ كِينْخْ تَخْدَمْ لَمُوتْ، تَخْدَمْ كِيُونْ تُودِرْتْ. ¹³ إِتَّيُورَا: «أَوْمَنْخْ غَانْ أَفْ أَسَوَالْخْ»، زُونْدِ لِيمَانْ أَدْ أَنُومَنْ أَلَا نِكَنِي غَانْ أَفْ نِسَوَالْ. ¹⁴ نِسَانْ إِزْدْ وَلَيْدْ إِسْتَكْرْنْ سِيدِيتَنْخْ يِسْوُغْ لَمْسِيْخْ غْ لَمُوتْ إِسْ رَادَاحْدْ إِسْتَكْرْ أَلَا نِكَنِي سِنْ يِسْوُغْ، إِسْبِيدَاخْ نِكَنِي دِيدُونْ غْ لَكْدَامْ نِسْ. ¹⁵ مِيَادْ كُلُوتْ كِنِي أَفْ إِلَا، أَيْنَاسْ تِكُوتَنْ وَلِي تِلْكَمْ نِعْمَتْ أَرْ تِكُوتَنْ وَلِي تِشَكْرِنِينْ إِلَمَجْدَنْ رَبِّي. ¹⁶ مِيَادْ أَفْ أُورْ إِنْبِي لَجْهَدْ نَخْ، أَشْكُو مَقَارْ أَيْتَمَاتْ بِرَانْخْ، أَكْنَسْ نَخْ أَرْ بَدَا إِتَّگَا لَجْدِيدْ أَسْ فْ وَاسْ. ¹⁷ أَشْكُو تَسَاسْتْ أَدْ نَخْ تِقْسُوسْ تِكْ بِينْ يَاتْ تَسَاعْتْ، أُورْ تِكَيْ يَاتْ غْ لَكْدَامْ نِأَرَازُو نِلَمَجْدَ إِدَأَوْمَنْ لِي سِرَاتِكْرُو. ¹⁸ نِكَنِي أُورَا نِسْمُوقُولْ تِغْوُسِوينْ لِي بِينِينْ، وَلَائِنِي أَنْسَمُوقُولْ دِتِلِي أُورْ بِينِينْ. أَشْكُو أَيْلِي يِيَانِنْ أَرْتْ تَلَاحْ، أَيْلِي أُورْ إِيَانِنْ إِكَا وِينْ بَدَا.

إِفْرُ وِيسَ سِمُوسْ

¹ أَشْكُو نِسَنْ إِغْ تَخْلَا تَخِيَامْتْ أَدْ نِوْكَالْ لِيغْ نِزْدَغْ، إِسْ دَارْنَخْ تَلَأْ يَاتْ تِكْمَيْ لِي يَاخْ إِبِنَا رَبِّي غْ إِكْنُوَانْ، تِكْمَيْ يَادْ تِكَأْ بِينْ بَدَا دِ أُورْ تِسْكِرْ سِإِفَاسْنْ نِأْفَكَانْ. ² خَتَادْ لِيغْ نِلَأْ أَرْكِيْسْ نِنْدَرْ نِكَنْ رَجَا نَخْ أَفْلَاسْ نِلْسْ تِكْمَيْ نَخْ لِي يِلَانْ غْ إِكْنُوَانْ. ³ إِغْ إِلَمَا نِلَسَا أُورْ سَارْ نِعْرَا. ⁴ نِكَنِي لِي لَانِينْ غْ تَخِيَامْتْ أَدْ

أَرْنِنْدَرْ نُثُورِي، أَشْكُو أُورْدِ إِسْ رَاسْتَ نَكْسْ وَلَائِنِي إِسْ رَا فَلَاسْ نِلْسْ تَيَاضْ، أَنْسْلُوكُوتِي تُودْرْتْ أَيْلِي يُمُونْتْ. ⁵ غِلَادْ رَبِّي سِ إِخْفَ نِسْ أَدَاخْ إِسْكَرْنْ فِ غُونْشِكَادْ، إِفْكَ أَخْ لَعْرِبُونْ نِ رُوحْ نِسْ. ⁶ غَانْ أَفْ بَدَا نِزْعَمْ نِسَانْ إِرْدْ مَاهَدْ نِلَّا سُولْ غِ دَاتْ أَدْ، رَانْ نِكُوْغْ فِ رَبِّي. ⁷ أَشْكُو لِيمَانْ أَسْ نِزَكِيزْ أُورْدِ أَيْلِي نِزْرَرَا. ⁸ نِكِي نِزْعَمْ إِكَاخْ لَفْرَحْ أَنْفَلْ دَاتْ نَخْ نِزْدَغْنْ دَارْ رَبِّي. ⁹ مِيَانْ أَفْ نِمَاعْ أَتْ نِسْرَضُو إِغْ نِلَّا غِ دَاتْ أَدْ أَلَا إِغْتَ نِفُوغْ. ¹⁰ أَشْكُو إِقْنَادْ أَكُلُو سُولْ نِبِيدْ غِ لَكَدَامْ نِ لَاحْكَامْ نِ لَمَسِيحْ، أَيَامْ كَرِيَگَاتْ يَانْ أَيْلِي إِرُورَا سِ أَيْلِي يِسْكَرْ لِيغْ سُولْ إِلَا غِ دَاتْ، غِ وَفُوكِي أَلَا غِ كَارْ.

¹¹ أَشْكُو نِسَنْ مِيَگَانْ تَكْصَاصْ نِ رَبِّي غَانْ أَفْ نِمَاعْ أَنْسَفَهُمْ مَدَنْ أَدْ أَمَنْ. رَبِّي إِيَابِينْ أَسْ مَنْگَانْ، أَرْنِتْرِجُو أَدَاونْ نِبَاينْ غِ ضَمِيرْ نِونْ أَلَا كَنِي. ¹² أُورْدِ إِسْ دَاخْ نِرَا أَنْتَالْغْ إِخْفَاؤْنْ نَخْ غِ دَرُونْ، وَلَائِنِي إِسْ نِرَا أَدَاونْ نِسْكَرْ مَمَنْكْ أَسْ أَسْرُنْخْ تَرْعَامْ، فِ أَدَرُونْ يِلِي لَوْجَابْ إِولِي زِعْمَنْيِنْ سِنْ أَدَمَأَونْ أُورْدِ أَوْلَادْنْ. ¹³ أَشْكُو إِغْ نِكَا إِنْفَالَنْ أَفْتَنْ نِكَا دِ رَبِّي، إِغْ نِلَّا لَعْقَلْ أَفْتْ نِلَّا دِ كَنِي. ¹⁴ أَشْكُو تَايِري نِ لَمَسِيحْ تَحْكُمْ كِيْنَخْ. نِحْقَاقْ مَاسْدَ يَانْ إِسْ إِمُوتْ فِ مَدَنْ كُلُوتْنْ، هِيَ مَدَنْ كُلُوتْنْ مُوتْنْ دِيدْسْ. ¹⁵ نِتَانْ إِمُوتْ فِ كَرِيَگَاتْ يَانْ فِ أَسُولْ أُورْ دَرْنْ وِلِي دَرْنِيin إِيْخَفَاؤْنْ نِسَنْ، وَلَائِنِي أَدْ دَرْنْ إِولِي يِمُوتْنْ غِ إِدِيسْ نِسَنْ إِنْكَرْدْ غِ لَمُوتْ. ¹⁶ هِيَ غِمْنْ غِلَادْ أُورْ سُولْ أَنْسَمْقُولْ حَتَّا يَانْ غِمْكَلِيتْ كُلُو سِمُوقُولْنْ مَدَنْ. مَقَارْ تَيْنْ نِكَا أَرْنِسْمُوقُولْ لَمَسِيحْ سِنْ غِمْكَلِيتْ كُلُو سِمُوقُولْنْ مَدَنْ، غِلَادْ أُورْ سُولْدَ غِمْكَانْ أَسَاتْ نِسْمُوقُولْ. ¹⁷ هِيَ يَانْ إِلَانْ غِ لَمَسِيحْ هَانْ إِكَا وَيَاضْ: أَيْلِي يِزْرِينْ إِفْتا، كَرِيَگَاتْ تَغُوسَا تَكَأْ لَجَيْدِي. ¹⁸ دَارْ رَبِّي أَدْ كُلُو إِكَا مَيَادْ، نِتَانْ لِي يَاخْ دِيدْسْ إِصْمَصِيلِيْخْ سِنْ يِسْوَعْ لَمَسِيحْ، إِفْكَاخْ أَنْسَكَارْ تَوُورِي يَادْنْ إِمْصِيلِيْخْ، ¹⁹ أَشْكُو رَبِّي إِلَادْ غِ لَمَسِيحْ إِصْمَصِيلِيْخْ دِيدْسْ مَدَنْ، أُورْ سُولْ فُلَاسْنْ إِحَاسْبْ دَنْوَبْ نِسَنْ، إِكَاخْ دِ وِلِي سَوَلِنِيْنْ فِ إِصْمَصِيلِيْخْ أَدْ. ²⁰ هِيَ أَنَّكَا دِ إِرْقَاصْنْ نِ لَمَسِيحْ، زُونْدْ إِغْ أَسْرُنْخْ إِنْتَشَارْ رَبِّي. أَرْنِتْضَلَابْ سِ إِسْنْ نِ لَمَسِيحْ أَرَأَونْ نِتَيْ: تَصْلَحَاتْ دِ رَبِّي. ²¹ أَشْكُو وِلِي جُونْ أُورْ إِسْنْ دَنْوَبْ إِكَا تِغْرِصِي فِ دَنْوَبْ نَخْ، أَدَاخْ سِرْسْ إِقْبَلْ رَبِّي غِ دَارْسْ.

6

إِفْرِ وِيسْ سِضِيَصْ

¹ لِيغْ زَا نِكَا وِلِي خَدْمَنِيْنْ دِ رَبِّي، أَرْكِيُونْ نِتَضَلَابْ أَدْ أُورْ تَامْزْ نَعْمَتْ نِ رَبِّي تَجْلُومْتْ. ² أَشْكُو أَرْ إِنْتَيْ: «لُوقَتْ نِ رَضَا أَغَاكْ سَفَلْخْ، أَسْ نِ نَجَا أَغَاكْ إِوْسْخْ». غِلَادْ هَا أَرْمَزْ نِ رَضَا. غِلَادْ هَا أَسْ نِ نَجَا.

³ أُورَا نِتَكَأْ لَعْرَتْ إِيَانْ غِ يَاتْ أَدْ أُورْ إِلُومْ يَانْ تَوُورِي نَخْ. ⁴ وَلَائِنِي كَرِيَگَاتْ تَغُوسَا أَغْدْ نِسْبِيَانْ إِخْفَاؤْنْ نَخْ إِسْ نِكَا إِخْدَامْنْ نِ رَبِّي سِ صِبَرْ إِكُوتْنْ: غِ تَسَاسِيْنْ، غِ تَمَارَا، غِ تِمُوكِرِسِيْنْ، ⁵ غِ تَرْفُوقْتْ،

غْ لْحِبُوسَاتْ، غْ ژَرَّا، غْ تِرَّلَا، غْ إِويْزْ، غْ أُثُومْ،⁶ غْ صَفَا، غْ تُوسَّا، غْ صِبْرْ، غْ لَخَاطِرْ، غْ رُوحْ لَقْدُسْ، غْ تَايِرِي غْ أُورْ إِلِي نَفَاقْ،⁷ غْ وَالْ نَحْقَ، غْ لَجْهَدْ نَ رَبِّي غْ سَلَاحْ نَ مَايِصْلَحْنْ غْ أَفَاسِي أَلَا أَرْلَمَاضْ. سَ شَانْ أَلَا لَحْكَرَأَوتْ، سَ أَيلِي فَلَاخْ تَعَادِنْ غْ مَايِعَدْلَنْ أَلَا مَايِخَشْنْ. أَرَاخْ تَكَانْ دَ إِمْضَارَنْ وَخَا نَتَّنِي لَحْقَ،⁹ زُونْدْ إِغْ أُورْ نَتِيُوسَانْ مَقارْ نَتِيُوسَانْ، زُونْدْ وَلِي مُوتَنِينْ مِشْ نَدَرْ بَدَّا، زُونْدْ وَلِي تَرْفُونِينْ مِشْ أُورْ مُوتَنْ،¹⁰ زُونْدْ وَلِيغْ تَلَا تَكُوضِي مِشْ نَفْرَخْ بَدَّا، زُونْدْ دَرَاوُشْ مِشْ إِكُوتْ مَانْسَغَنا، زُونْدْ إِغْ أُورْ نَطَافْ أَمِيَا نَكِنِي نَطَافْ كَرِيَگَاتْ تَغَوْسَا.

¹¹ أَرْسَرُونْ نَسَوَالْ أَيَيْتْ كُورِنِثُوسْ، أُورْ فَلَاؤْنْ نَسَنْتَلْ يَاتْ، نَرْزَمَاؤْنْ أَوْلَاؤْنْ نَخْ نَسُوسَعُوتْنْ. ¹² نَكِنِي هَانْ أُورَأَخْ تَسْضِيقْمْ، كَنِي أَيْضِيقْنْ غْ أَوْلَاؤْنْ نُونْ. ¹³ غَلَادْ أَرْسَرُونْ سَوَالْخْ زُونْدْ تَرَوَا نُو إِنِيخْ أَوْنْ: رَارَاتْ أَخْ أَرْطَالْ، تَرْزَمْ أَخْ أَوْلَاؤْنْ نُونْ أَلَا كَنِي!

¹⁴ أَدْ أُورْ تَلِيمْ دَ وَلِي أُورْ أَمِنِينْ غْ دُو يَانْ لَقُوسْ، أَشْكُو مَايِسْمُونْ مَايِصْلَحْنْ دَ كَارْ؟ مَانْ تَمُونْتْ إِلَانْ غْ كَرْ تَقاوْتْ تَلَاسْ؟¹⁵ مَانْ تَمُونْتْ إِلَانْ غْ كَرْ لَمَسِيحْ دَ إِيلِيسْ؟ مَايِشِرْكْ وَلِي يُومَنْ دَ وَلِي أُورْ يُومَنْ؟¹⁶ مَمْنُكْ أَسْ رَادْ تَمَشَاشْكْ تَكْمِي نَ رَبِّي دَ لَاصِنَامْ؟ أَشْكُو كَنِي أَنَّكَامْ دَ تَكْمِي نَ رَبِّي إِدرْنْ، غَمْكَلِي سَ إِنَا رَبِّي: «هَيْ رَاكِيَسْنْ زَدْغَ أَرْ زَكِيرْخْ غْ كَرَاتْسَنْ، كَخْ أَسْنْ رَبِّي، كَنِيَيِي مَدَنْ إِنُو. ¹⁷ هَيْ فَغَاتْ غْ كَرَاتْسَنْ تَرْلِيمَنْ، غَمْكَلِي سَ إِنَا رَبِّي. أَدْ أُورْ تَكَرْمْ إِيلِي يِلسَنْ أَفَلَاؤْنْ رَضُوخْ،¹⁸ رَادْ أَوْنْ كَخْ بَابَاتُونْ، تَكْمِيَيِي تَرَوَا نُو دَ إِسْتِي، غَمْكَلِي سَ إِنَا رَبِّي، لَيْ يِرْضَارَنْ إِكْرِيَگَاتْ تَغَوْسَا».

7

إِفْرُ وِيسْ سَا

¹ هَيْ لَيْغْ أَخْ كَلُو إِقاوْلْ رَبِّي سَ مَيَادْ أَيَيْتِمَا، إِلَا فَلَاخْ أَنْسَغُوسْ إِخْفَاؤْنْ نَخْ غْ كَرِيَگَاتْ تَغَوْسَا إِنَّلَسْنْ دَاتْ أَلَا رُوحْ، نَمَاعْ أَنْكُ وِينْ رَبِّي إِلِينْتْ كِينِخْ تَكِصَّاصَنْ نَسْ.

² رَزْمَاتْ أَخْ أَوْلَاؤْنْ نُونْ، هَانْ أُورْ نَفْعْ أَغَرَاسْ فْ يَانْ. أُورْ نَسْكُرْ كَارْ غْ يَانْ، أَلَا نَضْمَعَا غْ يَانْ.³ أُورْدْ إِسْ أَوْنْ نَيْخْ مَيَادْ أَفَلَاؤْنْ أُوتَخْ لَحُوكْمْ، أَشْكُو نَيْخْ أَوْنْ يَادْ غَادْ إِزْرِينْ إِسْ تَلَامْ غْ أَوْلَاؤْنْ نَخْ، أَدِيدُونْ نَمَتْ نَدَرْ دِيدُونْ.⁴ نَكِي أَوْمَنْخْ بَهْرَا كِيُونْ. زَعْمَخْ بَهْرَا سَرُونْ. عَمَرْخْ سَ زَعْمَتْ إِزْأَيْدْ بَهْرَا لَفْرَخْ إِنُو غْ تَسَاسِينْ نَخْ كَلُوتَتْ.⁵ تِزِي لَيْغَنْ نَلْكُمْ مَكْدُونِيَا أُورْ تَزِري دَاتْ نَخْ أَسُونْفُو وَلَائِنِي نَرْفُونْ كَنْتْ أَخْذْ تَسَاسِينْ كَرِيَگَاتْ تَسْكَا: تَمَاعْ غْ بَرَّا، تَكِصَّاصَنْ غْ أَكْنَسْ.⁶ وَلَائِنِي رَبِّي لَيْ يِزْعَامَنْ وَلِي تَيُوهْ حَكَرِينْ إِزْعَمَاخْ لَيْغَدْ دَارْنْخْ يُوشَكَا تِيُطُسْ.⁷ أُورْدْ لَيْغَدْ كَا دَارْنْخْ يُوشَكَا وَلَائِنِي أَلَا سَ زَعْمَتْ لَيْدْ كِيسْ تَكَامْ، دَ لَا خَبَارْ لَيْ يَاخْ فَلَاؤْنْ إِكْسْ مَاسْ تِوِيمْ رَجَا أَدِيدُونْ لَمُوقُورْخْ دَ غَمْكَلِي كِيُونْ إِغَما لَحَالْ دَ سَيْعَرْ لَيْ كِيُونْ

إِلَّا نَعْ لَجِهْتُ إِنُو، مَيَادُ كُلُوتْ إِرْوِيدْ إِلْفَرْحُ إِنُو. ^٨ أَشْكُو مَقَارْ أُونْ تَسَاعْ تِبْرَاتْ إِنُو تَكُوضِي أُورِي فِلَاسْ تَكْرَازْ غَلَادْ، مَقَارِي تَكْرَازْ غِسْ إِزْوُورْ. أَشْكُو تَسَاعْ أُونْ تَكُوضِي يَانْ أَزْمَزْ. ^٩ غَلَادْ إِسْ فَرْحَ، أُورْدْ إِنْ تَكُوضِي نُونْ، وَلَا يَنِي أَفْ فَرْحَ دْ غَمْكَلِي كَنْدْ تُرُورَا تَكُوضِي نُونْ سْ أَغْرَاسْ. أَشْكُو تَكُوضِي نُونْ تَكَأْ غَمْكَلِي يِرَا رَبِّي أَكَنْ أُورْ نَضْرُو سْ يَاتْ. ^{١٠} أَشْكُو تَكُوضِي لِيدْ إِمْشُوشَكَانْ دْ شُورْ نْ رَبِّي أَرْدْ تَرَارَا يَانْ سْ أَغْرَاسْ إِنْجَمْ أُورْ سُولْ أَتْ تَكْرَازْ، وَلَا يَنِي تَكُوضِي نْ دُونِيتْ أَسْ تَوِي دْ لَمُوتْ. ^{١١} غَلَادْ زِرَاتْ تَكُوضِي نُونْ لِيدْ إِمْشُوشَكَانْ دْ شُورْ نْ رَبِّي، مَنْشَكْ أَدْ كِيُونْ تَرُوِيدْ: نْ لِيقِينْ، دْ مَنْشَكْ أَسْ تَدْفَعَامْ فْ إِخْفَاؤْنْ نُونْ، تَحْشَامْ گَارْ، تَكْصَاصْمْ، تَوِيمْ سَرْنِخْ رَجَا، يِلِي گِيُونْ سَيْعَرْ، أَرْ تَامْرْ لَحَقْ. تَسْبَائِنْمَدْ غِ كَرِيَگَاتْ تَغَوْسَا إِسْ فِلَادْ أُورْ إِلِي يَاتْ غِ مَيَادْ. ^{١٢} نَكِي أُورْ أَوْنِينْ أَرِيخْ فْ وَلِي يَقْعَنْ أَغْرَاسْ أَلَا فْ وَلَيْفَتْ إِفُوغْ، وَلَا يَنِي أَفْ أَوْنِينْ أَرِيخْ دْ أَدَأْوَنْ إِيَائِنْ غِ لَكْدَامْ نْ رَبِّي مَنْشَكْ أَسْتَ كِينْخْ تَيُومْ. ^{١٣} مَيَادْ أَفَاخْ تَرْعَمْ سْ زَعْمَتْ نُونْ. وَلَا يَنِي إِرْعَمْ أَخْ بَهْرَا لَفَرْحَ نْ تِيُطُسْ، أَشْكُو يُوفَا كُلو دَرُونْ لَخَاطَرْ نِسْ. ^{١٤} أَشْكُو نِيَخْ أَسْ إِتِيُطُسْ إِسْرُونْ زَعْمَخْ، غَلَادْ أُورِي تَسْحَشَمْ، وَلَا يَنِي غَمْكَلِي يَصْحَا إِلِي سَاوَنْ كُلو نَنا، أَيْصَحَا إِسْرُونْ نَزْعَمْ غَمْكَلِي نَنا إِتِيُطُسْ. ^{١٥} نَنَانْ أَرْ بَدَا تَرِيَادْ تَايِري نِسْ غِ لَجِهْتُ نُونْ، كُونْ إِغْدْ إِكْتِي غَمْكَلِي سَرْسْ تَسْمَرْ حَبَامْ، تَضْعُومْ أَسْ تَكْمْ فِلَاسْ لُوقْ إِكْوُتنْ. ^{١٦} هَانْ فَرْحَ بَهْرَا أَشْكُو زَعْمَخْ سَرْوَنْ غِ كَرِيَگَاتْ تَغَوْسَا.

8

إِفْرَ وِيسْ تَامْ

^١ غَلَادْ أَيِيَتِما نَرَا گِيُونْ أَتَسَانْ فْ نَعْمَتْ نْ رَبِّي لِي يَفِكَا إِلْكَنَايِسْ نْ مَكْدُونِيَا. ^٢ مَقَارْ لَانْ غِ تَسَاسْتْ إِكْوُتنْ، إِلْكَتْ لَفَرْحَ نِسْنْ. مَقَارْ أُورْ طَافِنْ يَاتْ، إِكْوَتْ مَادْ فِكَانْ، ^٣ أَشْكُو گِيَخْ إِنِكِي إِسْ فِكَانْ سْ لَخَاطَرْ نِسْنْ أَيِّلِي مِ رَضَارْنْ أَلَا أَيِّلِي مِ أُورْ رَضَارْنْ، ^٤ أَرَاخْ تَحُورْمُونْ أَدَارْسَنْ نَامْزْ لَبِرَكَا لِي فِكَانْ أَسَرْسْ أَوْسَنْ إِيَيْتْ رَبِّي. ^٥ سَكْرَنْ أَكَارْ نْ أَيِّلِي گِيَسْ نَسِكِيلْ، فِكَانْ زَوَارْ إِخْفَاؤْنْ نِسْنْ إِسِيدِيَتْخْ، كَنْ إِلْمَا وَيَنْخْ سْ شُورْ نْ رَبِّي. ^٦ غَانْ أَفْ نَضَالِبْ تِيُطُسْ أَنْ دَرُونْ يَاشِكْ أَيْكَمْ لَخَدْمَتْ أَدْ لِي يَيِّدَا غِ كَرْتُونْ. ^٧ وَلَا يَنِي غَمْكَلِي كَنْ أُورْ إِحْصَى يَاتْ: غِ لِيمَانْ دْ وَوَالْ دْ تُوسَنَا دْ صَاحْتْ لِينْ تَكَامْ سْ كَرِيَگَاتْ تَغَوْسَا أَلَا تَايِري لِي سْ أَخْ تَرَامْ، أَرْكِيُونْ نَتَضَالَابْ أَدْ تَرِيَادْ غِ تَكِيَتْ أَدْ أَلَا نَتَاتْ. ^٨ أُورْدْ إِسْ گِيُونْ صَمِيرْخْ، وَلَا يَنِي أَرَاوَنْ سَوَالْخْ فْ صَاحْتْ لِينْ كَانْ وَيَاضْ، أَسَرْسْ أَرْمَخْ صَاحْتْ نْ تَايِري نُونْ. ^٩ أَشْكُو تَسْتَمْ تَكِيَتْ نْ سَيِيدِيَتْخْ يَسُوعْ لَمَسِيَحْ مَمْنَكْ أَتَكَأْ، مَقَارْ إِغْنَا إِكَا إِحْفَ نِسْ دْ دَرِيوشْ فْ سَبَّتْ نُونْ، فْ أَتَكْمْ وِيدْ غَنِينْ سْ غَمْكَلِي أُورْ إِطْفَ يَاتْ. ^{١٠} أَرْسَمُو قُولْخْ إِسْ گِيُونْ إِفُوكِي إِغْ تَرُوِيدْمْ فْ أَيِّلِي تَبْدَامْ أَسْكَالَسْ لِي يِزْرِينْ أَشْكُو إِنْفَعَاكْنْ مَيَادْ، كَنِي أَيِزْوَارْنْ إِسْ تَرَامْ مَيَادْ تَرُوِورْمْ إِسْتَ سَكْرَمْ. ^{١١} وَلَا يَنِي غَلَادْ كَمَلَاتْ تَوُورِي يَادْ أَلَا

نَّتَّاتُ، غَمْكَلِينَ سُرْسْ نَّتْگَامْ نَّبِيْتُ، أَسْ تَمَاغْمْ سْ أَيْنَا مْ تُوَفَّامْ أَسْتَ تَكْمَلْمُ. ¹² أَشْكُو إِغْنَ إِكَا يَانْ نَبِيْتُ سْ أَيْفَكْ كْرَا، أَرَاسْتَ إِقْبَالْ رَبِّي إِغْ إِفْكَا غْ أَيْلِي دَارْسْ إِلَانْ، أُورْدْ أَيْلِي دَارْسْ أُورْ إِلَيْنْ. ¹³ أُورْدْ إِسْ رِيْخْ أَفْلَاؤْنْ رُوْزِيْخْ سِفْسَاسْخْ فْ وِيَاضْ، ¹⁴ وَلَائِنِي أَكِيُونْ رِيْخْ ذْ أَتَنْكَدَامْ. أَيْقَنْ أَيْلِي يَأَوْنْ إِشَاضْنْ غَلَادْ أَسْدَرْمْ إِولِي فَلَاسْ لَكْمَنْيِنْ، أَرْكِيْغْ أَوْنْ إِوْسْنْ حَتَّا نَتْتِي سْ أَيْلِي يَأَسْنْ إِشَاضْنْ تِرِي نَا فَلَاسْ تَلْكَمْ. غَمْكَانْ أَسْ رَاتَنْكَدَامْ. ¹⁵ غَمْكَلِي إِنْتِيُورَانْ: «وَلِي يِسْمُونْ تُوكْتْ أُورَاسْدْ إِشَاضْ يَاتْ، وَلِي يِسْمُونْ إِمِيَكْ أُورْ إِلَكْمْ فْ يَاتْ».

¹⁶ أَرْنِتْشَكَارْ رَبِّي لِي يِكَانْ غْ أُولْ نْ تِيْطُسْ أَسْرُونْ إِسْهِمَا غَمْكَلِي سُرْونْ نَسْهِمَا، ¹⁷ أَشْكُو إِقْبَلْ أَيْلِي كِيسْ نَضَالْبْ. سْ لِيْغَنْ سُرْسْ إِكَا صَاحْتْ، يَاشْكُنْ دَرُونْ بْلَا سُولْ إِنَّا يَسْتِيْتْ يَانْ. ¹⁸ نَازْنْ دِيدْسْ كَمَاتْنْخْ لِي كَلُو تَالْغَنْتْ لَكْنَايِسْ إِسْ إِكَا أَمْزَالْ نْ تَبْرَاتْ نْ لَنْجِيلْ. ¹⁹ تَزَائِتْ أَسْنْ إِسْ إِكَا وَلِي سَتِيْنْتْ لَكْنَايِسْ، أَيْكْ أَسْمُونْ نَخْ إِغْ نَمُودَا نَوِي لِبَرَكَا يَادْ لِي نَسْمُونْ، أَسْرُسْ نَمْجَدْ رَبِّي نَمْلَاؤْنْ إِسْنْ نَكَا صَاحْتْ سْ مِيَادْ. ²⁰ نَمَاغْ أَدَاخْ أُورْ إِلَمَا يَانْ فْ لِبَرَكَا أَدْ إِكُوتْنْ لِي نَسْمُونْ. ²¹ نَمَاغْ فْ أَفُولْكِي غْ لَكْدَامْ نْ رَبِّي أَلَا وَبِنْ أَفْكَانْ. ²² نَازْنْ دِيدْسْ كَمَاتْنْخْ، لِي نَجْرَبْ مَنَاؤْتْ ثَوَالْ غْ كِيَكَانْ نْ تَعْوُسِوِينْ نَفْتِنْ إِلَا كِيسْ سَيْعَرْ، وَلَائِنِي غَلَادْ إِسْ بَهَرَا إِزُوْيَدْ سَيْعَرْ لِي كِيسْ فْ سَبَّتْ نْ غَمْكَلِي بَهَرَا كِيُونْ يُومَنْ. ²³ تِيْطُسْ نَتَّانْ إِكَا أَسْمُونْ إِنُو، أَرِيْ يِتَّاوسْ غَمْكَلِي يَأَوْنْ إِتَّاوسْ غْ تَوُورِي يَادْ. سِينْ وَيِتَّمَاتْنَخْ لِيَنْ دِيدْسْ إِمُونْ كَانْ إِرْقَاصْنْ نْ لَكْنَايِسْ، كَنْ لَمَاجْدَنْ لَمَسِيْحْ. ²⁴ هَيْ مَلَاتْ أَسْنْ غْ لَكْدَامْ نْ لَكْنَايِسْ، إِسْ تَصْحَا تَايِرِي نُونْ، إِصْحُو إِسْرُونْ نَزْعَمْ.

9

إِفْرِ وِيسْ طَرَا

¹ أَشْكُو أُورْ أَكْ حَتَّجَّا خْ أَدَوْنِينْ تَرَاخْ فْ أَتَسْمُونْمْ لَمَعاوِنْتْ أَدْ إِبِيْتْ رَبِّي. ² أَشْكُو سَنْخْ إِسْ نَّتْگَامْ غُونْشَكَانْ غْ لَعْقَلْ نُونْ غَانْ أَفْ سُرْونْ زَعْمَخْ غْ دَارْ أَيْتْ مَكْدُونِيَا، نِيْخْ أَسْنْ هَانْ أَيْنِمَاتْنَخْ غْ أَخَائِيَا إِوْجَادِنْ يَادْ غَمْنْ نَضَضَنَا. سَيْعَرْ نُونْ إِسْدُوْيَدْ تُوكْتْ نَسْنْ. ³ وَلَائِنِي أُوزْنَخْ أَوْنِينْ أَيْنِمَاتْنَخْ أَدْ أُورْ إِغْ إِسْ أُورْ تُكِيمْ أَمْبِيدْ نْ زَعْمَتْ لِي سُرْونْ نَزْعَمْ غْ مِيَادْ، أَتَلِيمْ فْ تَكْلُ غَمْكَلِي سَاسْنْ نِيْخْ. ⁴ أَشْكُو إِغْنَ دِيدِي مُونْ كْرَا نْ أَيْتْ مَكْدُونِيَا أَفْكَنِينْ أُورْ تِيُوْجَادَمْ رَادْ أَخْ تَسْنِحَشَامْ أَشْكُو نَزْعَمْ بَهَرَا سُرْونْ، كُنِيْ أَدَاكْ فَلَاؤْنْ أُورْ سَوْلَخْ. إِسْ رَاتَّحَشَامْ. ⁵ مِيَادْ أَفَنْ أَفِيْخْ إِسْدْ إِقَانْ أَدْ ضَالْبَخْ إِيْنِمَاتْنَخْ أَدْ زُوْرَنْ إِسْنْ دَرُونْ أَشْكَانْ، أَدْ إِوْجَادِنْ لِبَرَكَا نُونْ لِي سْ تَقاوِلْمْ، فْ أَسْتَ تِيُوْجَادَمْ سْ لَخَاطِرْ نُونْ أَتَكْ لِبَرَكَا، أُورْدْ شَحَاحَتْ. ⁶ هَانْ يَانْ إِشَحَانْ أَمْوَدْ إِدْرُوسْ مَادْ مَكْرَنْ، يَانْ إِسْوَكَنْ أَمْوَدْ أَرْ تِيُكَوْتْ لِبَرَكَا لِي يِمْكَرْ. ⁷ كُونْ يَانْ دْ أَيْلِي إِنْوَا غْ وُولْ نَسْ إِفْكَتْ، أَتْ فَلَاسْ أُورْ تَكْرَازْ أَلَا إِكَا فَلَاسْ هَكَّاكْ. أَشْكُو رَبِّي يِعْزَّ دَارْسْ وَلِي يَكَانْ سْ لَفَرْخْ. ⁸ هَانْ رَبِّي يِرْضَارْ أَفْلَاؤْنْ إِسْوَكْتْ كَرِيْكَاتْ لِبَرَكَا، أَبَدَا دَرُونْ يِلِي أَيْلِي كُنْ إِفَدَانْ غْ كَرِيْكَاتْ تَغَوْسَا،

إِسْوَكْتُ فَلَاؤْنُ كُولْ مَا إِفُوكِينْ. ^٩ غِمْكَلِي إِنْتُورَانْ: «إِضا تَيْفُوتْ، إِسْوَكْتُ لِيرَكَاتْ نُسْ فْ دَرَاوْشْ، لَخِيرْ نُسْ إِلَّا بَدَا». ^{١٠} هَانْ وَلِي يَجُوْجَادَنْ إِمْكَرَازْ أَمُودْ يَوْجَادْ أَغْرُومْ إِمْشَا، رَادَاؤْنْ يَوْجَادْ أَمُودْ نُونْ إِسْوَكْتْ، إِسْوَكْتُ تَيْفُوتْ نْ لَخِيرْ نُونْ. ^{١١} رَاكَنْ إِسْغُونْ غْ كَرِيْكَاتْ تَغُوسَا، تَكْمْ وِيدْ بَهْرَا سَخَنِينْ أَذْ تَشْكَارْنْ مَدْنْ رَبِّي فْ تَكِيتْ نُونْ لِي رَادَاسْ نَوِي. ^{١٢} أَشْكُو لَمْعَوْنْتْ أَذْ لِي تَسْمُونْمْ أُورْدْ إِسْ كَا نَقْنْ أَسْدَرْمْ إِيْبِتْ رَبِّي لِي فَلَاسْ لَكْمَنِينْ، وَلَائِنِي حَتَّا رَبِّي أَرْتْ بَهْرَا فَلَاسْ تَشْكَارْنْ. ^{١٣} أَشْكُو إِغْ زَرَانْ لَمْعَوْنْتْ أَذْ، رَادْ تَمْجَادْنْ رَبِّي فْ طَاعْتْ نُونْ إِنْجِيلْ نْ لَمْسِيْحْ دْ تُوكَأْ نُونْ دْ سَخَا لِي سْ دِيدْسْنْ تَبْضَامْ أَيْلِي دَرُونْ، تَبْضُومْتْ كُلُّ دْ وِيَاضْ. ^{١٤} رَادْ أَوْنْ تَدْعُونْ غْ طَرْلَا نَسْنْ تَعْزُومْ بَهْرَا دَارْسْنْ فْ سَبْتْ نْ نَعْمَتْ إِكْوْتْنْ لِي يَأْوَنْ إِفْكَا رَبِّي. ^{١٥} نَشْكُرْ إِرْبِي فْ تَكِيتْ نُسْ لِي أُورْ إِلِينْ آنَاوْ.

10

إِفْرْ وِيسْ مَرَأَوْ

^١ غَلَادْ كِيْخَنْ سَرُونْ أَنْوَزْ لَمْسِيْحْ دْ لَخَاطْرْ نُسْ، أَرْكَنْ تَضَلَّابْخْ نُكِينْ بُولُسْ لِي سْ أَتَتِيمْ أَرْ تَحْشَامْخْ إِغْ لِيْخْ غْ كَرْتُونْ، زَعْمَخْ إِغْ كِيْسْ أُورْ لِيْخْ. ^٢ أَرْكِيُونْ تَضَلَّابْخْ أَدِيْ أُورْ تَسْغِيمْ إِغْنْ أُشْكِيْخْ بَهْرَا زَعْمَخْ فْ كَرَا نْ مَدْنْ قَجْرَخْ سَرْسْنْ أَشْكُو غَالَنْ إِزْدْ لَغْرُضْ نْ دَاتْ أَيْخَنْ إِكَانْ. ^٣ أَشْكُو مَقَارْ نَلَا غْ دَاتْ، أُورَا نَتَمَاغْ سْ أَيْلِي يَكَانْ وِينْ دَاتْ. ^٤ هَانْ سَلَاحْ نَخْ لِي سْ نَمَّاغْ أُورْ إِكِي وِينْ أَفَكَانْ، وَلَائِنِي أَيْكَا دْ وِينْ رَبِّي لِي يَرْضَارْنْ سْ لَجَهْنْ نُسْ أَيْخُلو إِكِيدَارْ. ^٥ أَرْخَلُو گَارْ إِسْوَنْكِيْمِنْ دْ كُولْ مَايَتَتِيْنْ أَذْ إِكْ لَكْدَامْ إِتَوْسَتَا نْ رَبِّي، نَكْرَفْ كَرِيْكَاتْ إِسْوَنْكِيْمِنْ نَسْضَعْوَنْ إِلْمَسِيْحْ، ^٦ نَكِينْ نُوْجَادْ أَنَّامَرْ لَحَقْ غْ كُولْ مَايْقُوغْنْ أَغْرَاسْ، تَرِي نَا تَكْمَلْ طَاعْتْ نُونْ.

^٧ إِزْدْ بَرَانْ تَغَوْسِوِينْ كَا أَتَسْمُوقْلَمْ؟ وَنَا إِحْقَاقْ إِسْ إِكَا وِينْ لَمْسِيْحْ، أَيْسَانْ إِزْدْ غُونْشَكَلِي سْ إِكَا وِينْ لَمْسِيْحْ أَتْ سَرْسْ نُكَانْ أَلَا نَكِينْ! ^٨ أَشْكُو أُورِيْ إِسْرَكْمْ إِغْنْ سُوفِيْخْ يَانْ إِمِيكْ أَرْتَعَنَخْ سْ لَادْنْ لِي يَاخْ إِفْكَا سِيدِيَتَخْ أَكَنْ سَرْسْ نَبَنَا، أُورْدْ أَكَنْ سَرْسْ نَخْلُو. ^٩ أَذْ أُورْ بَايِنْخْ زُونْدْ إِغْ أَكَنْ سُوْيِدْخْ سْ تَبْرَاتِينْ إِنو. ^{١٠} أَشْكُو كَرَا كِيْوَنْ أَرْ إِتِيْ: «تَبْرَاتِينْ نَسْ شَقَّانْتْ جَهْدِنْتْ، وَلَائِنِي إِغْ إِلَّا غْ كَرَا تَتَخْ دَاتْ نَسْ تَضَعَافْ، أُورْ إِسْنْ أَيْسَاوْلْ». ^{١١} زُونْدْ غُوَادْ أَيْسَانْ: إِزْدْ غِمْكَلِي نُكَانْ غْ وَوَالْ نْ تَبْرَاتِينْ نَخْ إِغْ أُورْ نَلِي غْ كَرْتُونْ، أَرَانْكْ سْ لَاقْعَالْ نَخْ إِغْ نَلَا غْ كَرْتُونْ. ^{١٢} أَشْكُو أُورْ نَرْضَارْ أَنَّكْ يَانْ دْ وَلِي تَالْغَنِينْ إِخْفَاؤْنْ نَسْنْ، أَلَا دِيدْسْنْ نَسْنَكَبَالْ إِخْفَاؤْنْ نَخْ. نَتِتِي أَرْتِقِيَاسْنْ إِخْفَاؤْنْ نَسْنْ دْ إِخْفَاؤْنْ نَسْنْ، أَرْتِنْ دِيدْسْنْ سَنْكِيَلْنْ، غَانْ أَفْ أُورْ فَهْمَنْ يَاتْ. ^{١٣} نَكِينْ إِغْ أَنْتَعَنَا أُورَانْ نَزْرَايْ إِوْتَا، وَلَائِنِي نَعْمَانْ غْ أَكْنَسْ نْ إِوْتَا لِي يَاخْ إِسْكُرْ رَبِّي، إِوْتَا يَادْ أَيْخَنْ إِسْكَمْنْ أَرْ دَرُونْ. ^{١٤} نَكِينْ أُورَانْ نَزْرَايْ إِوْتَا نَخْ، أَشْكُو أَيْكَانْ إِغْتِيَنْ نَزْرِي دْ إِغْدْ جُونْ دَرُونْ أُورْ نَكِيْ. وَلَائِنِي نَكِينْ أَيْزْوَارْنْ إِسْ أَوْنِينْ نَسْنَكَلْمْ تَبَرَاتْ نْ لِنْجِيلْ نْ لَمْسِيْحْ. ^{١٥} أُورَانْ نَزْرَايْ إِوْتَا

أَذْ أَلَا أَرْتَعْنَا سِنْ أَلَيْيِي سُكْرُنْ وِيَاضْ، وَلَائِنِي أَرْنَتْرُجُو أَبِيرَأِيدْ لِيمَانْ نُونْ أَبِهِرَا تْرَابْدْ تُوُورِي نَخْ غْ كُرْتُونْ غْ إِوتَّا لَيْ كِينِنْ وِينْخْ،¹⁶ أَرْكِيغْ نِبِشْرْ وِلِينْ لَانِينْ غْ تْسِكَا أَنْ نْ تِمِيزَرْ نُونْ، أَذْ أُورْ نَتْعَنَا سِنْ أَلَيْيِي سُكْرُنْ وِيَاضْ غْ أَكْسْ نْ إِوتَّا نُسْنْ.¹⁷ أَشْكُو أَرَا نْ رَبِّي أَرْ إِنْتِي: «وَنَا إِنْتَعَانْ أَرْ إِنْتَعَانْ سِيدِيتْنَخْ».¹⁸ أَشْكُو أُورْدْ يَانْ إِتَّالْغُنْ إِحْفْ نَسْ أَفْ إِرْضَا رَبِّي، وَلَائِنِي أَفْ إِرْضَا دِيَانْ إِتَّالْغُ.

11

إِفْرْ وِيسْ يَانْ دْ مِرَاوْ

¹ مِلَادْ إِسْ كَا تَصِبَرْمْ إِنُوفْلْ إِنُو يَانْ إِمِيكْ! مِشْ تَصِبَرْمْ أَسْ نِيتْ. ² نُكْي گِيگِي أَسَامْ نُونْ، أَسَامْ نْ رَبِّي. أَشْكُو ضَالْبَخْكِنِينْ إِيَانْ أَرْكَارْ، أَتْ إِكَانْ دْ لَمَسِيحْ، إِرِيغْ أَدَاسْكِنْ فَكْخْ زُونْدْ كِرَا نْ تِعِيَالْتْ إِغُوسْنْ.³ وَلَائِنِي كَصُوضْخْ أَدَاوْنْ إِجْرُو أَلَيْيِي يِجْرَانْ إِحْوَاء لِيغْتْ إِغْصَرْ الْكَمَاضْ سْ تِكَنَادْ نُسْ، أَكَانْ إِجْلُو لَعْقَلْ نُونْ تَفْلِمْ نِيتْ إِصْقَانْ لَيْ تَقْدَمْ سْ لَمَسِيحْ.⁴ أَشْكُو مِلَادْ إِسْنْ دَرُونْ يُوشْكَا كِرَا نْ يَانْ أَرْكُنْ إِتَّبَشَارْ سْ كِرَا نْ يَسُوعْ يَضْنِينْ لَيْ سُكْنْ أُورْ نِبِشْرْ، نَغْ أَوْنِينْ يُوي كِرَا نْ رُوحْ يَاضْنْ لَيْ دَارْنَخْ أُورْ تُومِزْ، نَغْ كِرَا نْ لِنْجِيلْ يَاضْنْ لَيْ أُورْ تُومِزْ، غُوانْ رَادْ أَسْ نِيتْ تَصِبَرْمْ.⁵ وَلَائِنِي إِرْقَاصْنْ نَا نُونْ مَقُورِنِينْ أُورْ نِيخْ إِسِيْيِي أُوفْنْ سْ كِرَا.⁶ إِغْ أَكْ أُورْ سَنْخْ أَدْ سَوَالْخْ، هَانْ أُورِيِي تَخْصِي تُوستَا. مِيَادْ نَسِيَنْ أَوْنِتِيدْ كُلُو غْ كَرِيَكَاتْ تَغُوسَا.⁷ نَغْدْ إِسْ فَاعْ أَغَرَاسْ لِيغْ رِمْزِيَخْ إِحْفْ إِنُو فْ أَتِيمُغُورْمْ، بَشَرْخَكْنْ سْ لِنْجِيلْ بَلَا تَفْكَامْ فَلَالَّسْ يَاتْ?⁸ كَسْخَدْ إِلْكَنِيسْ يَضْنِينْ أَلَيْيِي دَارْسْنْ أَمْرَخْ دَارْسْنْ تَغْرَادْ فْ أَدَاوْنْ خَدْمَخْ، حَتَّا لِيغْنْ دَرُونْ أَشْكِيَخْ حَتَّجَاخْ، أُورْ رُوْثِيَخْ فْ يَانْ.⁹ أَلَيْيِي فْ لَكْمَخْ أَيْتِمَاتْتَخْ لِيدْ أَشْكِنِينْ غْ مَكْدُونِيَا أَيْبِيتْ إِفْكَانْ. غَمْكَادْ أَسْ مَاعْ غْ كَرِيَكَاتْ تَغُوسَا إِرِيغْ أَسُولْ مَاعْ أُورْ كَخْ أَزَارُو فْ يَانْ.¹⁰ مَاحَدْ إِلَّا گِيگِي لَحَقْ نْ لَمَسِيحْ، أُورَادِيِي يِكَسْ يَانْ غْ تَمَرِرتْ نْ أَخَائِيَا مِيَادْ لَيْ سْ أَتَعْنَاخْ رِعْمَخْ سَرْسْ.¹¹ مَاخْ؟ إِزْدْ إِسْ دَرِي أُورْ تَعْزِيمْ؟ رَبِّي كَا أَيْسَنْ.¹² وَلَائِنِي أَلَيْيِي سَكَارْخْ رَاتْ أَكَانْ سُولْ سَكَارْخْ، فَادْ أُورْ أَجْخْ أَزْمَزْ إِولِي سِكَلِينِينْ أَزْمَزْ أَدْ بَايَنْ إِسْ گَانْ زُونْدْ نَكْنِي غْ أَلَيْيِي سْ أَتَعْنَانْ.¹³ أَشْكُو زُونْدْ غُويْدْ أَدْ گَانْ دْ إِرْقَاصْنْ سَكْرِكِسِينْ، گَنْ إِخْدَامْ إِمْغَضَارْنْ، أَرْدْ سَبِيَانْ إِخْفَاؤْنْ نَسْنْ إِسْ گَانْ إِرْقَاصْنْ نْ لَمَسِيحْ.¹⁴ غُونْشَكَانْ أُورَاكْ إِكِي لَعْجَبْ. أَشْكُو حَتَّا شِيَطَانْ أَرْ إِسْبِدَلْ إِحْفْ نَسْ إِكْ زُونْدْ لَمَلَاكْ نْ تِقاوْتْ!¹⁵ هَيْ إِخْدَامْ نَسْ أُورَدْ أَكْ سَكَرِينْ إِغْ سَبِدَلْنْ إِخْفَاؤْنْ نَسْنْ سْ إِخْدَامْ نْ مَايِصْلَحْنْ. مِشْ رَادْ أَسْنْ تَكَرُو سْ أَلَيْيِيدْ رُورَانْ لَافَعَالْ نَسْنْ.

¹⁶ أَرَاوْنْ دَاخْ تِتِيَخْ: أَدُورْ إِغَالْ يَانْ كَتُونْ إِسْ گِيَخْ وَارْ لَعْقَلْ. وَلَائِنِي إِغْ تَنَّامْ گِيختْ تَقْلِمِيَيْ كَا زُونْدْ وَارْ لَعْقَلْ، أَدْ أَفْخْ أَدْ تَعْنَاخْ سْ إِحْفْ إِنُو أَلَا نَكِينْ يَانْ إِمِيكْ.¹⁷ أَلَيْيِي تِتِيَخْ غِيدْ أُورْ إِكِي غَمْكَلِي يِرَا سِيدِيتْخْ، وَلَائِنِي أَرْ سَوَالْخْ زُونْدْ وَارْ لَعْقَلْ، رِعْمَخْ أَرْتَعْنَاخْ.¹⁸ لِيغْ گُونْ وِلِي تَعَانِينْ سْ إِخْفَاؤْنْ نَسْنْ،

هان حتا نكي را سرس تعناخ.¹⁹ كني لي لانين لعقل! أر نيت تصبارم س لفرح إيد وار لعقل.²⁰ اشكو أرتتصبارم ايأنكن إتگان د إسمگان! د يانكن إشتان! د يانكن إسغلان! د يان فلاؤن إتنوين! د يانكن إكين س إمريقن!²¹ حشمخ أدلون إنيخ: زوند تروگزا يان هان اور أستن نظرصار! ولايني رضارخ أد فغ لعقل إنو أرتتعناخ الـ نكين س ايلى س اتعنان.²² إغ گان غ أيت لعبانيين هان الـ نكى گيچ گيسن، إغ گان غ أيت إسرائيل هان الـ نكى گيچ گيسن، إغ گان أمودن إبراهيم هان الـ نكى گيخت.²³ إغ گان إخدامن ن لمسيح أراسن تتيخ زوند وللي يفاغن لعقل نس، هان گيچ أسدن أفلا: اتيختن غ ترلا، اتيختن غ أكوراي لي شيخ، د لحبوسات لي زريخ، فتوخ أر إكي ن لموت اوردن يان صور الـ سين.²⁴ أوهابن سموست تکال أدارسون شيخ سين إد عشرين ن أصواتن إفع يان.²⁵ كرات توال أد شيخ أكوراي، يات تکلت رجمتبي، كرات توال أسرنخ ترزا سقينت، زريخن ضييضن د أزال غ ترومت ن لبحر.²⁶ منشك ن صور أد موديخ، إليخ غ لخطر ن إسافن، د إمخارن، د وين ايديري، د وين لگوس، إليخ غ لخطر غ تمندت، الـ غ لخلا، الـ غ لبحر، د لخطر ن ايتمانن ن ژور.²⁷ زريخ تكريت تمارا، اووزخ أصان ف وياضن، زريخ لازز د إرفى، د توگت ن اژوم، د أصنميش د لعرا.²⁸ ترايتن إنغوسوين أد کلوتن: زيار لي بيتريادن اس ف واس، د ترلا ن لکنایس لي س کلو تکفخ.²⁹ مانوا إضعافن اورايخ إضعاف؟ مانوا إطارن غ ثوب اورا إجدر أول نخ س توگوضي?³⁰ إغد إكان أد تعناخ، أرتتعناخ س ضعف إنو.³¹ إسن ربى لي يگان باباس ن سيديتخ يسوع لمسيح ليد بدا إروران تولغا اس اور سكرکيسخ،³² ليغ تين گيچ غ دمشق، إنکر لحاكم لي يگا اگلید لحارث ف تمدن د إكت غ دو تضاف، بري ادي يامز.³³ ولايني زوگزنيد کران ويتمانن غ وریال غ يان شرجم غ صور، فوكوخ غ إفاسن نس.

12

إفر ويس سين د مراو

¹ إقاند اوکان سول تعناخ مقار گيس اور تلي لفایت، مانیخن س ايلى ژريخ د ايلى يسعلم ربى.² کران کوژ د مراون اسگاس اياد ستخ يان ارگاز یومن س لمسيح، إتيلال س ويس کراض إکوان. اور الما ستخ اس إتيلال س دات نس نغد س روح نس؟ ربى ايسن.³ غمکلي س ياد نيخ: ارگاز أد ستخ اس إتيلال، ولايني اس إتيلال س دات نغد س روح؟ اور ستخ. ربى ايسن.⁴ إيتاي س لجنت لفردوس، إسفله إکران إوليون لي س اور یوفي اداسن يالس، الـ إتفکايس لادن. اتن يني ايان.⁵ زوند ارگاز أد ارسنس تعناخ، ولايني نكى ن إخف إنو اور تعناخ ابلا س ضعف إنو.⁶ اشكو إغالك ريخ أد تعناخ اوراد كخ وار لعقل اشكو اوراد تتيخ ابلا لحق. ولايني اريخ أد تعناخ أد اور إغال کران يان اس گيچ اگار ن غمکلي سيفي يسمقول نغد اگار ن ايلى م دري إسفليد.⁷ ولايني فاد اور کابرخ ف سبت ن توگت ن ايلى يسعلم

رَبِّي، إِنْكَارِي يَانْ أُسْتَانْ غْ دَاتْ إِنُو زُونْدْ أَرْقَاصْ نْ إِلْلِيسْ، أَرِي يِكَاتْ أَدْ أُورْ كَابِرْخْ.⁸ مِيَادْ أَفْ غَرِيخْ إِرْبِي كَرَاطْ تَوَالْ حُورْمُوتْ أَتَيْنْ فَلِي يِسْتِي.⁹ إِنَّا يِي: «تَوْدَاكْ نَعْمَتْ إِنُو، أَشْكُو لَجْهَدْ إِنُو ضَعْفْ أَغَادْ إِنْكَمَالْ». هِيَ عَلَادْ رَادْ بَهْرَا تَعْنَاغْ رَضُوخْ سْ ضَعْفْ إِنُو، أَدْ فَلِي يِكُوزْ لَجْهَدْ نْ لَمَسِيحْ.¹⁰ غَانْ أَفْ رَضِيقْ سْ ضَعْفْ إِنُو، رَضُوخْ سْ تَرْكَامْ تَمَارَا أَلَا تَرْقُوفْتْ دْ تَسَاسِينْ فْ سِبَّتْ نْ لَمَسِيحْ. أَشْكُو تِزِي لِيغْ ضَعَافَخْ أَغْ دُوسْخْ.

¹¹ عَلَادْ هِيَي كِيَخْ وَارْ لَعَقْلْ أَرْتَعْنَاخْ، مِشْ كَنْيِي أَدِيَيْتْ إِسْعِينْ! أَشْكُو كَنْيِي أَرَادِي يَادِرْ سْ مَايِفُولِكِينْ، أَشْكُو مَقَارْ أُورْ كِيَخْ يَاتْ أُورِي أَفْنْ إِرْقَاصْ نَا دَرُونْ مَقُورْنِينْ سْ يَاتْ.¹² تَمَارَ لِي كَنِينْ تِينْ أَرْقَاصْ نْ رَبِّي سَكْرُخْتَتْ سْ تَمَا نْ صِبَرْ غْ كَرْتُونْ: غْ لَمَعْجَازَتْ دْ لَعْجَابَتْ دْ أَيْلِي جُونْ أُورْ تَشِرِيمْ.¹³ أَشْكُو مَانْ تَغْوِسَا سَكْرُخْ إِلْكَنَائِسْ يَاضِنْ أُورْ أَوْنَتْ سَكْرُخْ، أَيْنَا أُورْ إِكِينْ غَمْكُلِي أَكِيَخْ أَفْلَاؤْنْ رُوزِيَخْ؟ أَوَا صَمَحَاتِي إِغْ فَلَاؤْنْ فَغْ أَغَرَاسْ!¹⁴ هِيَي تِيسْ كَرَاطْ تَوَالْ أَيَادْ إِوْجَادِخْ أَنْ دَاخْ دَرُونْ أَشْكُخْ، مِشْ أُورَأْ فَلَاؤْنْ رُوزِيَخْ أَشْكُو كَنْيِي أَدْ سَكِيلْخْ أُورْدْ أَيْلِي تَطَافْمْ. أَشْكُو أُورْدْ إِحْسَمِينْ أَيْتَخَزَانْ لَمَعِيشْتْ إِولِينْ أَرُونِينْ، وَلَائِنِي وَلِينْ أَرُونِينْ أَيْسِنْتْ إِتَخَزَانْ.¹⁵ نِكِي إِكَايِي بَهْرَا لَفْرُخْ أَنْ فَلَاؤْنْ كِيَخْ كَرَا دَرِي، مَدُوخْ فَلَاؤْنْ إِخْ إِنُو، إِغْ فَلَاؤْنْ سُوكَتْخْ تَايِري نُو إِسْ زَا رَافِلي تَسْدِرْسِمْ تَتُونْ?¹⁶ عَلَادْ أَرْ تَقْرُومْ إِسْ فَلَاؤْنْ أُورْ كِيَخْ أَزَاثُو، وَلَائِنِي أَرْتِتِيمْ كِيَخْ أَمْغَضَارْ، أَمْرَخْكِنْ سْ تَخْدَاعْتْ!¹⁷ إِسْكُنْ زَا سَغْلَاخْ سْ كَرَا نْ يَانْ غَ وَلِي يَوْنِينْ أَوْزِنْخْ?¹⁸ تِيطِسْ نِكِينْ أَيِسْ إِصَالِبِنْ أَنْ دَرُونْ يَاشْكْ، أَزْنِخْ دِيدِسْ كَمَاتْخَ لِي تَسْتِمْ، إِسْكُنْ زَا إِسْغَلَلْ تِيطِسْ؟ إِزْدْ أُورْدَ يَاتْ نِيَيْتْ أَكْلُو سَرُونْ نَعْمَرْ؟ إِزْدْ أُورْدَ يَانْ أَغَرَاسْ أَكْلُو نَضْفُورْ؟.

¹⁹ نَغْدْ إِسْ تَعْلَمْ إِسْ أَنْتَدَفَعَا فْ إِخْفَاؤْنْ نَخْ غْ لَكْدَامْ نُونْ؟ هَانْ لَكْدَامْ نْ رَبِّي أَغْ نَسْوَالْ نِلي غْ لَمَسِيحْ، مِيَادْ كُلُوتْ أَيْيَتِمَا أَرْتْ نَسْكَارْ أَكْنْ سَرْسْ نَبِنَا.²⁰ أَشْكُو كَصُوضَخْ إِغْنْ أَشْكِيَخْ أَكِينْ أَفْخْ أُورْ تَكِيمْ غَمْكُلِي كِيُونْ رِيخْ، أَلَا كِيَخْ أَوْنْ غَمْكُلِي كِيَغِي تَرَامْ. كَصُوضَخْ أَتَلِي طَرِيطْ غْ كَرْتُونْ دْ لَحَسَدا دْ لَعَضَبْ دْ نَزَاعْ دْ تَرْكَامْ دْ تَنْتَوَشْتْ دْ لَكِيَرْ دْ إِرْوَائِينْ.²¹ إِكْصَاصْخْ إِغْنْ دَاخْ دَرُونْ أَشْكِيَخْ، أَدِي يِسْدُلُو رَبِّي غْ دَرُونْ، أَرْ أَلَّاخْ فْ وَلِي فَغَنِينْ أَغَرَاسْ غَادْ إِزْرِينْ أُورْ تُوبِنْ غْ أَيْلِي سَكَارْنْ نْ مَايِلِسْنْ دْ زَنَا دْ گَارْ شَهَوَاتْ.

13

إِفْرِ وِيسْ كِرَاصْ دْ مِرَاوْ

¹ عَلَادْ تِيسْ كَرَاطْ تَوَالْ أَيَادْ رَانْ دَرُونْ أَشْكُخْ. «كِرِيَكَاتْ أَوَالْ رَأْيِيدَ فْ إِمي نْ سِينْ أَرْ كِرَاصْ إِنْكَانْ». ² عَلْمَخْكِنْ يَادْ لَيْغْ دَرُونْ كِيَخْ تِيسْ سَنَاتْ تَوَالْ، عَلَادْ غْ أُورْ لِيَخْ غْ كَرْتُونْ أَرْكِنْ دَاخْ تَعْلَمْخْ إِنِيَخْ إِولِي فَغَنِينْ أَغَرَاسْ أَيْلِي تَتِيَخْ إِكْرِيَكَاتْ يَانْ: هَانْ إِغْنْ وَرِيخْ أُورَادْ حَنُوْغْ غْ حَتَّا يَانْ كَتُونْ.³ دْ لَيْغْ أَنْسِكِيلْمْ لَبْرَهَانْ إِسَادْ كِيَغِي يِسْوَالْ لَمَسِيحْ، هَانْ أُورْ إِسْعَافْ غْ لَجِهْتْ نُونْ، وَلَائِنِي لَجْهَدْ أَيْطَافْ غْ

گرتوں۔ ⁴ اشکو مقارِ اتصالب غ ضعف، ادر س لجه ن ربی. الا نکنی نضعاف، ولاینی لیغ دیدس نگا
یان ندر س لجه ن ربی لی س آدیدون نتصریف۔ ⁵ جرباتِ إخفاون نون اس إصحا ليماں نون، أمرات
إخفاون نون. ماخ اور سنتم اس گیون ازدغ لمسيح؟ اغ اور سنتم هي اور ترکام۔ ⁶ ولاینی ارترجو خ
أتسانم اس نزکا۔ ⁷ غلاد ار نظر لا إربی اد اور تسكارم گار، اورڈ ف اد نبین اس نزکا، ولاینی ف
أتسكارم مایقولکین، مقار ایون نتبیان اس اور نزکا۔ ⁸ اشکو اور نرضار انسکر کرا ایگان ضیض ن الحق،
ولاینی اینا نسکر نسکرت الحق۔ ⁹ ارنقراخ اغ نضعاف نکنی تدواسم کنی. د ایلی ف داخ نظر لا د اتگم
وید کملنین۔ ¹⁰ ارواونین تراخ میاد غلاد غ اور لیخ غ گرتون، اسرؤون اور قجرخ اغن حاضرخ. اشکو
لادن لیي يفکا سیدیتخت افکابیت ف اکن سرس نبنا اورڈ اکن سرس نخلو.

¹¹ غ اس اگرا ایبیتما، فرحتات تگم وید کملنین، زعمات. گات یان غ اسونگیمن نون. إليات غ لهنا.
آدیدون بی ربی ن تایری د لهنا۔ ¹² سلمات د انگرتون انسلیم ایگان وین ربی۔ ¹³ ار کلو فلاون سسلامن
ایت ربی۔

¹⁴ آدیدون نلی نعمت ن سیدیتخت یسوع لمسيح، نلی کلو دیدون تایری ن ربی، د تمونت ن روح لقدس.
آمين